

Powšitkowne WOZJEWJENJA

njedźelu, 24. septembra 2023

Wusyłanje Božeje mše

Serbskorěčnu Božu mšu móža wěriwi tutu njedźelu, 24. septembra, w 9.00 hodź. z Chrósćic jako livestream scěhować. Link na nju je w interneće pod www.posol.de a na wosadnej stronje podaty.

Nyšpor z požohnowanjom konjacych zapřahow ze zběrku za ponowjenje pomnika Cyrila a Metoda

Towarstwo Cyrila a Metoda z.t. (TCM) přeprošuje wšitkich wěriwych zaso na wosebity nyšpor domchowanki z požohnowanjom konjacych zapřahow. Tón budže tutu njedźelu, 24. septembra, w 14.00 hodź. w Chrósćicach na łuce při Hatkach. Na nyšporje budže zběrka za ponowjenje pomnika swjateju Cyrila a Metoda pola Stróžišća. Po njeskutku spočatk lěta je Założba za serbski lud přizwoliła, zo narunanje škody ze 70 procentami podpěruje. Tamne 30 procentow ma TCM same zwjesć.

Štóž chce, móže pjenježny dar na konto TCM: Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Pomnik“ přepokazać.

Za wustajenje darowanskeje kwitowanki měli zajimcy TCM swoju adresu podać, pak telefonisce pod čisłom (0 35 91) 55 02 10 pak z mailku na adresu TCM@Posol.de.

Nowy nabožny spěwnik za dźěci předleži

Worklečanske dekanatne dušepastyrstwo za dźěci je w lěću nabožny dźěcacy spěwnik „Chwalimy Boha“ wudało. Dohromady 177 spěwow je rozrjadowanych do pjeć kategorijow, kotrež steja pod hesłami „Z Bohom spočinać (rano) – Z Bohom skónčić (wječor)“, „Boža mša“, „Z wutroby jemu spěwajmy – na zemi a w njebjesach“, „Z Bohom přez lěto“ a „Zabawne spěwy“. Spěwnik smědža wšitcy, wšojedne hač wosady, pěstowarnje, šule, swójby a wšitcy dalši zajimcy wužiwać. Kupić móža sej jón za 7,50 eurow w Dekanatnym dušepastyrstwje za dźěci we Worklecach, na Chróšćanskej farje abo w Radworskim Katolskim dźěcacy domje „Alojs Andricki“.

Klětu putnikowanje ministrantow do Roma

Přichodne mjezynarodne putnikowanje ministrantow do Roma wotměje so klětu wot njedźele, 28. julija, do soboty, 3. awgusta. Wobdželić smědža so na tym ći, kotřiž su na dnju wotjězda w aktiwnej ministrantskej službje a znajmjeńša 13 lět stari. Kóšty wučinja za přenje dźěco 500 eurow, za druhe 400 eurow, za třeće a dalše dźěci 300 eurow na wosobu. Dalše informacije, na přikład k přizjewjenju, budu pozdžišo wozjewjene.

Film wo hrě „Mór a lubosć“ wšěm přistupny

Předstajenje hry „Mór a lubosć“ móža sej wotnětka wšitcy jako film w interneće wobhladać – a to w třoch wariantach. Widzeć stej předstajeni rozdźelneju wobsadkow hłownych rólow dźiwadźelnikow w serbskej a jedne jako synchronizowana wersija w němskej rěči. Přistup na film je w interneće pod www.posol.de podaty.

Zakónčenje wustajeńcy „Čej’ da sy?“

Finisaža wustajeńcy „Čej’ da sy?“ w Budyskim Serbskim muzeju budže njedźelu, 22. oktobra. Kuratorka Andrea Pawlikowa powjedže w 15.00 hodź. w němskej a w 16.00 hodź. w serbskej rěči posledni raz po njej. Na to scěhuje zakónčace zarjadowanje.

Oratorij „Wěra, nadźija, lubosć“ trójce zaklinči

We wobłuku koncertoweje jězby přeprošuje wokalowy ansambl TonArt z Münstera na tři koncerty w Hornjej Łužicy. Mjez druhim předstaji němski oratorij „Wěra, nadźija, lubosć“ serbskeho komponista Feliksa Brojera z Budyšina. Solisća budu Thorsten Schwarte (bas), kotryž je zdobom nawoda ansambla a koncerty zhromadnje z Feliksom Brojerom diriguje, Katharina Poell-Scharpenberg (mecosopran) a z Wjazońcy pochadzaca sopranistka Annette Richter-Westermann. Instrumentalny přewod přewozmu Renata Bacher na pišćalce, Sebastian Pietsch na cellu a komponist Brojer na klawěrje. Prěni koncert budže sobotu, 30. septembra, w 17.00 hodź. w klóšterskej cyrkwi w Pančicach-Kukowje. Dalšej předstajeni slědujetej njedźelu, 1. oktobra, w 17.00 hodź. w ewangelskej cyrkwi we Wjazońcy a pónđzelu, 2. oktobra, w 19.00 hodź. w Budyskej Marije Marćinej cyrkwi. Zastup na wšěch třoch koncertach je darmotny. Na kóncu budže kolekta.

Domowa spěwna šula startuje

Katolska domowa hudźba při Budyskej tachantskej cyrkwi swjateho Pětra zahaji w oktobru chórowy spěwny kubłanski projekt za džěci a młodostnych w šulskej starobje. Za tak mjenowanu domowu spěwnu šulu móža so zajimcy hač do tuteje njedźele, 24. septembra, přizjewić. Link k tomu kaž tež k stronje z nadrobnišimi informacijemi je pod www.posol.de podaty.

Wukubłanje JULEICA

Worklečanske młodžinske dušepastyrstwo přewjedže tež klětu zaso za zajimcow kurs JULEICA. Na nim móžeš sej kmanosće k nawjedowanju skupin džěci a młodostnych priswojić. Wukubłanje wobsteji z dweju dželow a wotměje so stajnje wot pjatka do njedźele, 2. do 4. februara, kaž tež wot 26. do 28. apryla, w Smochćicach, tam z přenocowanjom. Zajimcy měli so nimo toho na kursu přenjeje pomocy wobdźělić. Tón budže sobotu, 2. měrca, we Worklečanskim Don Boskowym domje. Přizjewjenja přijimuju online. Link je pod www.posol.de podaty.

Womłodźić so

Pod titulom „Fit přez nazymu – bazowje so posćić a žórta mocy sej wotewrěć“ přeprošuje Smochčanske kubłanišćo swjateho Bena na wožiwjacy wotpočink za čěto a duch w přezjednosći z přírodu. Tón wotměje so wot wutory, 31. oktobra, hač do njedźele, 5. nowembra. W nim je warjenski kurs „bazisce fit“ integrowany. Link k přizjewjenju je pod www.posol.de podaty.